

新修曲沃縣志卷之二十七

金石考

周秦漢魏刻劃無訛宛委岫嶠留意搜羅蟲書鳥篆須費摩挲希世之寶貺我良多 志金石

晉侯束髮冠 民國十五年春薛莊村農人某創其舊牆基得一瓦罐誤創罐碎內一物光芒奪目撫於手圓形周七寸薄如指甲。花紋極工細重兩餘不知爲何物。後識者曰此古諸侯束髮冠也。金質。乃三代物。薛莊距古晉都數里其爲晉侯冠無疑。後經北京古玩客聞知爭來賞鑑。且均願以重價購之。每開驗時異光滿室人咸驚賞不置云。

宋鐘 縣城社倉巷口路北鐘樓一所。有鐘一具。周一丈六尺五

新修曲沃縣志

卷二十七

第五考 金石考

一

寸高六尺七寸。宋宣和四年歲次壬寅重陽日絳州曲沃縣崇真觀鑄。邑簿張勉之爲之銘曰。

道本虛靜。隨感隨應。

在形而上。孰能比稱。

鑄此洪鐘。體靜中虛。

叩之則鳴。道其寓緒。

莫堅於金。莫久於道。

聖壽與俱。冰位大寶。

鐵蓮花磬 在中西門外十方院。明正德七年鑄。高二尺。周八尺。磬底乃蓮花式。擊之音甚洪亮。

鐵馬

在縣城七郎廟。明嘉靖三十八年三月鑄造。馬勢甚雄壯。

人有赳赳武夫之氣概焉。

鐵瓦 在縣東北四十里橋山中峰軒轅廟中。鑄造不知年月。每逢歲旱。村民禱雨。見有片雲止簷際。輒雨。

鐵牛 在城隍廟獻殿前。牛背鑄字。記明係吉必里王朝罡母史氏造。明萬曆十一年正月。氏在家夜夢一人說你化度善人。於城隍廟鑄造鐵人鐵牛。延壽十年。氏未舉辦。旋復夢如初。且每夜攪不安。氏乃說於衆善人。爭施財銖。鑄造鐵牛鐵人。同結良緣等語。今時歷數百載。鐵人已遺失無蹤。惟牛巍然獨存云。

鐵當陽磬 在中西門外感應寺。明嘉靖二十年七月造。高一尺六寸。周七尺八寸。鑄有銘詞四句。法輪常轉。佛日增輝。皇圖永固。帝道遐昌。

唐碑 靈光寺在縣東南二十四里閻村。唐永徽三年勅建。虢州參軍王勃奉勅撰文勒碑。沃史云。文古時遠。碑碎字蝕。譯墳無高僧。字義多舛謬。蓋文義深奧。聱牙佶屈。在昔年人已苦其難

讀。清乾隆戊寅。湘潭張公坊。以當代名儒。任新田邑令。因詳爲校閱。正其句讀。後之覽者。始能探尋其義理。研究其詞旨云。

宋碑^一 嘉祐二年。創建文廟。豎碑立石。邑大儒甯智撰文。載入藝文志。魏人王子龍書。字體雄健。酷類顏柳。碑陰鐫佛經及佛龕一。深寸餘。佛像五。高尺餘。碑左右亦俱鐫佛經。石質光明。地方人士。莫不珍視之。

宋碑^二 晉恭世子廟碑。宋嘉祐進士吳勉之撰。守孟州王屋縣尉張傑書。神宗八年九月立。書法結撰。方正遒勁。仿顏公多寶塔。蓋具體而微者。文及銘詞。入藝文志。

宋碑^三 秋林寺碑。在張少村。寺建自魏延昌三年。碑立在宋熙寧九年。時代遙遠。字多剝落。間有讀成句者。文義甚古奧。

恭世子碑 元至正七年立碑文分辯賦記三類字體均有顏柳遺風文陳辭痛切合鑄一石因節錄之以誌感念。

申生辯

奎章閣承制學士靳榮撰 河東貢士譚惟一書

春秋書晉侯殺其世子申生說者曰書晉侯惡其用讒名申生斥其陷父是以名稱爵號褒爲貶也靳公辯內特爲鄭重聲明云不曰自殺而曰晉侯殺之聖人所以罪其父而傷其子也斯眞探本窮源之論可以闢陷父之瞽說已又云衛太子伋不逃父命與申生之事何殊焉然而太史公傷之而不咎之此言之昭昭而不可掩者獻公之世卿大夫之賢者不爲不多矣未聞有一言而釋其冤者嗟夫祁奚叔向不生於此而生於彼宜乎申生不能免於死也。

新修曲沃縣志

卷二十七

第五考 金石考

三

弔申生賦

前進士河南陳九思撰 御史臺監察御史劉尙書 沁州儒學學正董孝恭家藏

甲午之秋余始至新田訪古遺迹得晉世子廢祠於孤城之隅瓦磚摧剝基址荒蕪苔蘚昏而石碑已仆棟梁盡而木偶空餘天陰月黑兮飛螢走燐風淒雨慘兮愁兔悲狐嗚呼昔獻公之沈惑信驪姬之讒邪伊夫子之見誣禍竟成於牙齒胡爲乎害我仁賢生此虺蛇仰號蒼蒼茫乎窅爾孰知所以然邪夫讒隙之始構兮將陰賊於汝躬或勸之以出奔兮諒斯言之可從惡惡名之足累兮且何國其不吾容何以自明其無辜兮固不害於爲恭胡爲死而不顧兮卒甘心於憫凶百謀身而莫贖兮恨綿綿而何窮因四望而歌曰。

喬之山兮蒼蒼澮之水兮湯湯今來兮古往地老兮天荒冥冥

兮在何許。風蕭蕭兮吹我裳。懷昔人之不見。空盡日而徬徨。

諡恭愍記

前鄉進士房希文撰

翰林國史院書史張思恭書

太禧宗禋院掾曲沃靳恭讓。嘗以晉世子申生死節事具聞政。府移命太常。定諡曰恭愍。遂俾致祭。爲忠烈勸。嗟夫。申生遭人倫之變。以死自決。周八百有餘年。其間復有死節如申生者乎。然則恭愍之諡。於義爲稱。邑人柴郁。時爲中書檢校書吏。勇於爲義。舉千載之曠典。相勗奉祀於歲時。以符邦人之望云。

宋硯 南莊清附生李錫。家藏瓦硯一方。紋理極細。宋元符三年製。鑄上醉桃源調一闋。蘇東坡書。其詞曰。而文玄。而腹便。經史類孝先。池中雲雨接連天。蛟龍不得眠。

石佛 高四尺餘。在大李村。宋治平二年九月十五日。郝頭裴文

新修曲沃縣志

卷二十七

第五考 金石考

四

玉裴用成衆莊等重新修補。維咸亨三年。歲次壬申。十二月戊午朔十六日癸酉。并州大督府倉曹參軍事裴居儉兄弟等奉。爲考舒州使君敬造供養。清乾隆癸卯十月二十六日。奉政大夫知江南寧國府事。曲沃裴志灝。從聞喜縣裴柏村祖莊移來本縣大李村石佛寺。粧修供奉。

金碑 宋末文廟毀於兵火。僅存講堂。金熙宗皇統元年。良鄉宋公重建。豎碑以誌厥事。邑大儒史中和撰文并書。文載入藝文志。碑陰鐫佛經及佛像三。人咸寶貴之。

元碑 世祖至元六年。感應寺十王院僧永貴。爲其師法安智寶立石。徵事郎晉寧路平陸縣尹進士張敏撰。承事郎冀寧路忻州判官許德基書。文瀟灑脫俗。字體尤秀勁。碑高一丈。勢頗雄

偉。碑身左右鐫串子蓮花樣翻新。殊覺生色。銘曰。

猗歟大雄。真空之空。靈精靈明。應感無窮。

自今自昔。綿歷宗風。二師之德。克承克崇。

愬持於外。精進於中。惟望維遠。有績其宏。

載嶸載嶸。儼立梵宮。如淨域界。新田融融。

如香水海。澮流沖沖。法施之久。循環始終。

躋彼遐躅。胥嗣前功。勒銘貞石。佩念惟恭。

黃帝廟碑 在縣城黃帝廟東北院豎立。千數百年之古物也。高八尺餘。寬三尺餘。碑額雕尺虎二形。勢古老。頗似龍。按黃帝廟本濟溪廟。明正統間。土人於廟西鑿井。得古碑焉。土花繡澁。石質完好。陽鐫黃帝廟三大字。其陰有贊曰。道德巍巍。聲教溶溶。

與天地久。億萬無窮。因改祀黃帝。土人名井廟。井在今天池內。北對學宮。一名硯池。

莊簡碑銘 明李莊簡公神道碑銘。在大南莊。太子太師吏部尙書華蓋殿大學士夏言撰。

銘曰。太保之顯。發祥而躬。羽翼天朝。惟此赤忠。焯焯者行。炳炳者功。首歷郎署。夙夜靖共。薦陟銀臺。敷奏協衷。京兆挺挺。綽有古風。尋貳司馬。乃正司空。視時阜土。靖疆翊戎。秩宗典禮。寅亮天工。名成身退。山岳並崇。碩德偉望。流光無窮。克昌厥後。以保令終。史詔來世。勒銘幽宮。

荀大夫碑 荀王村乃荀息大夫故里。陵墓在村北。高九尺。週圍五丈。豎石碑一。高丈餘。未載年月。形勢甚古。字亦遒勁。題曰晉

大夫荀息之墓。決非近數百年物。額題有周名臣。位列正卿二語。碑陰鐫七絕一首。大夫忠貞似烈霜。履危蹈險扶綱常。一朝同死雙君命。留得清名萬古香。

恭世子祠牆碑 明嘉靖三年八月。禮部侍郎狀元呂柟來縣。適邑令李德進祭恭世子。因致胙焉。呂躬謁其祠。得絕句四章。遂并書以勒諸石。

秋經曲沃雨如狂。縣祭申生一夜涼。却憶當年毒胙手。于今翻見致臙薶。

世子全非小丈夫。誰將簿正久湮蕪。當年若免驪姬譖。唾手扶王陋霸圖。

巍峩廟貌對金山。心在青松白石間。明白有人爲鬼蜮。世人猶

或重讒頑。

曲沃城中十字街。俗傳怒踐驪姬骸。須知世子恭心孝。禽草譖傷亦感懷。

花碑 明隆慶時。西凝村觀音院建一碑碣。其石甚奇。碑之表面有形圓中空者。如花果之點綴。有形而曲直者。如枝幹之橫斜。通體皆然。人疑爲石中精華外溢。村人相傳。咸稱爲花碑云。

夢感泉碑 明洪武八年知縣朱武立。當明中葉時。泉已涸。惟碑至今獨存。金華張孟兼爲之銘。并序。

夢感泉出曲沃縣北三十里。始本槁壤。或井之。至十尋不得水。民恒病焉。華亭朱武爲縣之明年。有野夫夢白衣人揖謂曰。茲土出泉。利若等矣。覺而憶之。曩嘗夢若是。因以告鄉鄰之人。幸

有同其夢者。亟往而發之。果得是泉。野夫來告曰。苟藉以力。則泉益濫足。以利茲土。然不敢私。惟吾宰命焉。朱君既聽之。往觀其泉。其地可溉者多矣。朱君以告予。予甚怪之。仍名爲夢感泉。蓋縣即古新田之地。遂爲之銘曰。惟茲新田。土厚水深。曾古之是云。而何異夫今。有泉奮發。感於夢尋。斯或政理所懷。而欲衍之於方來者哉。

清原寨墓碣 明崇禎六年九月。西楊柳村人士爲保衛計。築寨於村之乾方。忽崩墓誌於南崖下。石刻大都督開國楊公燕夫人數字。紀年曰開皇九年。誌地曰直清原。時邑庠生楊鵬翼爲之記。以爲取通鑑史書考之。乃隋楊素公無疑。因名其寨曰清原寨云。

漢槐碑 在縣城東南雷神臺上。清嘉慶九年。邑進士李發英爲之記。

漢槐記

槐爲虛星之精。而能壽於松柏。大槐坂上。逐車塵。爭效先生折角巾。蓋惟其人。不惟其木也。季氏有嘉樹。宣子譽之。武子曰。宿敢不封殖此樹。以無忘角弓。余益以知不惟其木。惟其人也。顧小知不及大知。小年不及大年。冥靈楚南。大椿上古。豈與夫朝菌日及。爭榮落於晨昏哉。孟子言牛山雖美。尋之以斤斧。則濯濯者見矣。有能輪囷離奇。垂蔭數畝。上閱千年。下貞終古。斯亦羣芳中尹結之衣冠。而循乞之紀譜也。沃東關雷神臺巔古槐一本。不知其幾千年也。傳者謂始於漢順帝永建四年。蓋夢若

老人自言云。是槐摧於雷火。既悴復榮。沃人所及見也。以若所夢。孰從而聞之。而信之。然而古槐靈異。所在多有。南柯一郡見夢。淳于橐茅鄉社。經翦拜之餘。復立如故。至音聲之樹。則兆啓黃扉。尤靈之靈。異之異也。惟是永建四年。洎乎今日。千六百七十六年矣。其時詔引敦樸之士。增孝廉爲四科。周舉爲諫議大夫。李固爲太山太守。張綱爲廣陵太守。讀史至此。未嘗不深老成典刑之慕。而曠代相感。歎歎不禁。至目擊物存。乃僅得諸一槐之末。亦無以快嗜古之心胸矣。且槐惟其古。猶之人惟其舊。而漢與非漢不論也。以漢論。則雷臺之北。漢壽侯之廟在焉。侯樹義雲天。芑蔭萬禩。豈亘古鬱勃之精神。顧借照於茲槐歟。抑神實憑依。而長呵護。以至有靈與。扶持自是神明力。正直皆因。

造化功。果爾則與孔明廟前古柏。宣尼塚上老檜。同標今古之偉幹。無不可者。徒怪世人忽於所近。大坂槐亟豔稱之。而茲槐錦心綉腹。無與刻鏤。乃至不得與林交鴨脚。同臚沃乘。即曰傳疑未必傳信。然齊諧諾皋。獨不足爲文人淹博之資哉。思敬社公直李君培翰。李君耀文。喬君功德。宋君周濂。社首賈君萃。王君雲緯。郭君永祺。趙君繼文等。有見於此。謂異聞不可不廣也。軼事不可不傳也。愛人者愛烏。思人者思樹。槐懷也。亦以懷壽侯於勿諼也。護以臺。丐以記。而余仍綴之以歌。

黃髮老人虬髯古。自言生年李杜伍。揭來封建得絳土。河汾懸匏無足數。坐閱蜀魏爭龍虎。隋唐宋元一仰俛。漢壽秩祀闕堂廡。日暮肅肅神靈雨。絲音竹韻不須吐。春秋讖詩更展舞。移星

換物千百年。龍鳳攫拏勢曲拳。一任太空雷雨填。榮華天秀骨石堅。石彌堅。心常在。幹回元氣通真宰。古姿疎冷夕陽多。絳山絳水舊不改。我聞此語直太息。夢耶真耶兩難識。槐不能言言以臆。香葉亦欲鸞鳳棲。苦心不教螻蟻蝕。松柏推爲丈人行。龐眉書客亦矜式。

堯殿牆碑 曲村鎮文思廟堯殿門外。東壁鐫萸莢。西壁鐫獬豸。各有題詞。邑大儒張子特撰。

東壁題詞

聖無違天。天自符聖。堯階萸莢。與月相應。萬年有月。萬年有萸。聖代草木。偕時枯榮。

西壁題詞

獸亦如人。好惡不同。窮奇所欲。獬豸所攻。所貴於聖。致中和氣。有獬無奇。陶唐之世。